


FASNACHTSGESELLSCHAFT



BASEL ALTI GARDE GEGR. 1995

Fasnacht 2018

Crash Air Basel - Bruchpilote am Laufmeter

Ganz eerlig – wurdsch Du in e Fluugi styge,
Wenn de gnau waisch, as im Pilot d Erfaarig manglet,
Wenn s zuedäm unter dr Bsatzig nid duet gyge,
Will e Jede mit em Andere ranglet?
Hättsch Du in so-n e Fluuggsellschaft Verdraue,
Wo d Pilote bhaupte as si fliege kenne
Und kuum duesch uf das Verdraue baue,
Denn merggsch, as die im Cockpit penne?
Wurdsch Du in so-n e Fluugzyg sitze,
Wo dr Pilot syni Gnepf und Schalter nit verstoot,
Wo d Bsatzig scho bi jedem Rugg duet schwitze,
Will sy merggt, as es richtig Absturz goot?
Hättsch Du Verdraue in e Pilot wo dr Kompass nit ka lääse
Und au dr kinschtlig Horizont nit gnau verstoot?
Wo maint, d Fluglaitstell das syg e sphärisch Wääse
Wo aim – wenn Duusel hesch – dr Vordritt loot?
Wurdsch Du mit e-m e Pilot um d Ärde tschette
Wo kai Aanig het, wo s duure goot?
Ganz klaar Nai, und do druff kasch wette,
Denn soon-e Flug, das wär e Fluug in Dood.
Sogar mit Fallschirm und em e Sitz bim Notausgang,
Wurdsch Du kuum jee so-n e Fluugrais bueche,
Denn uf so-m e Fluug wird s aim Angscht und Bang
Und s Happy Landing kasch go sueche.
Jetzt stell Dir emool Basel als groosses Fluugi vor,
Wo vorne drin im Cockpit d Gsamtregerig hoggt,
Dert probiert z styre und scho gsesch d Gfoor,
Die Situation isch dotal verboggt.
Mit siibe Cäpten wo vo pilotiere kain e Schimmer het,
Derfir e Jeede maint nur är wiss Bschaid,
Landsch bi däm Flug – do mach y jedi Wett -
Wenn s guet goot uf dr näggschte Waid,
Mit ere Chefpilotin Ackermäa,
Wo nie nyt sait und nie nyt macht,
Bisch in so-m ene Fluugi nid guet draa,
Kasch sicher sy, as es do bald gracht.
Am beschte wurd drum d Frau Ackermäa
Und das isch e Rootschlaag unter Frinde,
Aifach numme das mache, wo sy wirgglig kaa
Und uf dr näggschti Erschti kinde.
Schynts kenn sy ganz passabel e Gitarre zupfe,
Dasch rächt und guet, duet niemerem wee
Und wär gscheyter, as im Cockpit mit am Rueder z rupfe,
Denn wenn sy goot - vermisst sy kaine mee.

Im Cockpit sitzt au dr Cäpten Wessels Hampe
Und lächlet wie immer e bizli quäält,
E Fluugi z styyre isch halt nit wie Velo drampe,
So merggt är scho glyy as d Veloglogge fäält.
Am liebschte fliegt är als uf grumme Toure,
Grad so wie s nei Dreierdram in s Elsass uuse,
Und verwischt derby syni dubiose Spuure
Mit Myllioone-Gschängg – do kunnt aim s Gruuse.
Au dr Pilot Baschi, wo als gärn uf Blindflug macht
Und drum nie checkt wo s duure goot,
Merggt nit as es im Polizei-Dep gracht
Und bis är s merggt isch s lengschtens z spoot.
Sy Pilot-Entschaid blybt wischi-waschi,
Är entlosst sy Polizeichef Fall uf Knall.
Dä Schnällschuss isch ganz typisch Baschi,
Hauptsach s git fir iin kai freie Fall.
Dr Pilot Ängelbärger duet ganz uf Sichtflug fliege
Und isch scho gly uf Crashkurs mit dr Spitalfusion.
Dä Kurs mit de Rampasse kaasch nit uf s Radar griege,
Statt Chefpilot spiilt är drum Pausegloon.
Dr Cäpten Cramer brobiert verzwyflet d Hechi z bhalte
Und versuecht dr kinschtlig Horizont z begryffe,
Doch d Finanzierig vo dr Uni duet die Hoffnig spalte,
Und d Baselbieter dien em d Aier schlyffe.
Scho gly kaa-n är dr Bode nimme gsee
Und trotz Primar-Lehrbricht au nimm sy Bodepersonal,
Denn mit sym Nääbejob an dr Uni verdient är mee
Und s Loos vo de Schuele isch iim egal.
Dr Cäpten Brutschin isch lang guet gflooge
Und kuum je naime yyne grasslet,
Syt em Sturzflug vo Basel World fliegt är im Booge,
Denn dr Kamm het iim dä Flug vermasset.
Jetzt stoot die Röschtiraffle scho gly läär
Und kai Mäss wird mee das Huus belääbe,
Das Crash Air Fluugi isch vyyl z schwäär
Und blybt dorum am Bode glääbe.
Im Hangar brietet d Herzog iiber de Finanze
Vo däre Crash Air Basel wo do Richtig Absturz fliegt.
Die Crash Air liggt scho gly am Ranze,
Wenn d Crew nid schnällschtens d Kurve griegt.
Drum zum Schluss e Vorschlaag vo uns Alte Mugge:
Schigget die Bruchpilote zue uns Alte
Bi unserem Vordraab kenne sy dr Schuelbangg drugge
Und leere wie me-n e graade Kurs ka halte.

*D Frau Fasnacht laadet y an d Ladärne-Usstellig
uff em Minschterblatz und an d Usstellig vo de
Wääge und Reggwisyte uff em Kasärneblatz
Vom Mäntigzoobe bis am Mittwuchmoorge.*

www.muggedaetscher.ch